

USIM sasar 31 pengembaraan GISO tahun ini

SEREMBAN 5 Feb. - Aktiviti pengembaraan Global Islamic Students Outreach (GISO) akan menjadi aktiviti tahunan Universiti Sains Islam Malaysia (USIM) dalam melaksanakan agenda pemindahan ilmu selain memahami budaya masyarakat antarabangsa.

Naib Canselor USIM, Profesor Datuk Dr. Asma Ismail berkata, GISO yang dimulakan pada 2011 hingga 2013 menyaksikan sebanyak 41 pengembaraan meliputi 15 buah negara dilakukan mahasiswa dan pensyarah universiti ini.

“Pada tahun ini, USIM menyasarkan 31 aktiviti pengembaraan GISO dan berharap ia dapat mendedahkan mahasiswa kepada persekitaran budaya antarabangsa serta kehidupan mereka,” katanya pada Majlis Perwakilan Pelajar (MPP) Universiti Sains Islam Malaysia (USIM) di Hotel The Aston, Nilai dekat sini semalam.

Majlis ini dihadiri Menteri Besar, Datuk Seri Mohamad Hasan selaku Menteri Mentor USIM.

Katanya, walaupun GISO melibatkan pengembaraan luar negara, USIM tidak pernah melupakan agenda memperkasakan masyarakat dalam negeri ini.